

Seis. Dáse nova redacción ao artigo 50.1.C), que queda redactado como segue:

«C) Do resultado das dúas letras anteriores deducirase o importe das cotas soportadas ou satisfeitas pola adquisición ou importación de activos fixos, considerándose como tales os elementos do inmovilizado e, en particular, aqueles dos que se dispoña en virtude de contratos de arrendamento financeiro con opción de compra, tanto se a dita opción é vinculante, como se non o é.

O exercicio deste dereito á dedución efectuarase nos termos que regulamentariamente se establezan.»

Disposición derradeira segunda. Entrada en vigor.

Esta lei entrará en vigor o 1 de xaneiro de 2006.
Por tanto,

Mando a todos os españois, particulares e autoridades, que cumbran e fagan cumprir esta lei.

Madrid, 29 de marzo de 2006.

JUAN CARLOS R.

O presidente do Goberno,

JOSÉ LUIS RODRÍGUEZ ZAPATERO

5692 *LEI 4/2006, do 29 de marzo, de adaptación do réxime das entidades navieiras en función da tonelaxe ás novas directrices comunitarias sobre axudas de Estado ao transporte marítimo e de modificación do réxime económico e fiscal das Canarias. («BOE» 74, do 28-3-2006.)*

JUAN CARLOS I

REI DE ESPAÑA

Saiban todos os que a viren e entenderen que as Cortes Xerais aprobaron e eu sanciono a seguinte lei:

EXPOSICIÓN DE MOTIVOS

I

A Comunicación C(2004)43, do 13 de xaneiro de 2004, da Comisión Europea, relativa ás novas directrices comunitarias sobre axudas de Estado ao transporte marítimo, empra os gobernos dos estados membros a que, antes do 30 de xuño de 2005, modifiquen os seus réximes de axudas ao transporte marítimo para adaptalos aos criterios fixados nelas.

Despois de analizar a normativa española en materia de axudas de Estado ao transporte marítimo, concretamente o réxime de entidades navieiras en función da tonelaxe, recollida no capítulo XVII do título VII do texto refundido da Lei do imposto sobre sociedades, aprobado polo Real decreto lexislativo 4/2004, do 5 de marzo, e de comparala coas novas directrices, o Goberno español confirmou á Comisión a aceptación das propostas de modificar a súa lexislación antes do 30 de xuño de 2005, introducindo os cambios necesarios para que as axudas de Estado ao transporte marítimo en España sexan conformes con aquelas. Estas modificacións concréntanse nos seguintes asuntos:

Extensión do mencionado réxime ás entidades que realicen, na súa totalidade, a xestión técnica e de tripulación dos buques incluídos no réxime especial.

Permítese a aplicación do réxime aos buques de remolque que realicen actividade de transporte marítimo, entendéndose como tal cando menos do 50 por cento dos ingresos da actividade de remolque realizada durante o período impositivo procedan da actividade realizada en portos ou da prestación de axuda a buques autopropulsados para chegar a porto.

Amplíase tamén o réxime ás dragas que realicen actividade de transporte marítimo, entendéndose que existe tal cando, durante o período impositivo, máis do 50 por cento dos ingresos da actividade sexa o depósito no fondo do mar dos materiais extraídos. Neste caso, a aplicación do réxime especial queda limitado a esta parte de actividade de transporte.

Exíxese que os buques con actividade de remolque e de dragaxe que se inclúan no réxime especial deban estar rexistrados en España ou noutro Estado membro da Unión Europea.

Permíteselles aos interesados que poidan incluír nas súas solicitudes buques non rexistrados en España ou noutro Estado da Unión Europea, sempre que manteñan ou incrementen a porcentaxe de tonelaxe neta baixo rexistro comunitario respecto da tonelaxe total de buques da entidade acollidos a este réxime especial.

O incumprimento desta última condición suporá a exclusión do réxime especial daqueles buques que motivasen este incumprimento, salvo que a entidade explote ao menos o 60 por cento da súa tonelaxe neta baixo rexistro comunitario.

Por outra parte, o actual réxime de entidades navieiras en función da tonelaxe foi autorizado pola Comisión Europea na súa Decisión do 27 de febreiro de 2002. Ulteriormente, o Goberno español, mediante Carta do 17 de novembro de 2003, presentou unha proposta de modificación relativa á inclusión no réxime dos servizos prestados ao buque adscrito ao réxime (practicaxe, remolque, amarre e desamarre), así como aos servizos relacionados coa carga do buque (carga e descarga, estiba e desestiba). A Comisión aprobou a proposta de modificación na súa Comunicación C(2004)1931/2, do 28 de maio de 2004, polo cal tales actividades quedan incluídas na explotación de buques propios ou arrendados.

Por último, a citada Comunicación C(2004)43, no número 3.2, «Custos salariais», establece que os Estados membros autoricen diversas reducións dos custos e cargas ligadas ao emprego de mariños comunitarios nos buques matriculados neles, até alcanzar niveis acordados cos estándares mundiais. A propia directriz indica que no caso dos buques que presten servizos regulares de pasaxeiros entre portos da Comunidade soamente se considerarán, para efectos das medidas aquí establecidas, como «mariños comunitarios» os nacionais da Comunidade e dos Estados parte no Acordo sobre o Espazo Económico Europeo. Para adaptar o noso ordenamento a esta directriz introdúcense as modificacións necesarias na Lei 19/1994, do 6 de xullo, de modificación do réxime económico e fiscal das Canarias. Canto á bonificación nas cotizacións á Seguridade Social, xa vixente no marco do réxime económico e fiscal das Canarias, esta lei especifica a obriga do Estado de efectuar a achega correspondente ao orzamento da Seguridade Social.

II

A Comisión Europea adoptou o pasado 7 de xullo de 2004 unhas novas directrices comunitarias sobre axudas estatais de salvamento e de reestruturación de empresas en crise (Comunicación 2004/C 244/02), polas cales se empra os Estados membros a adaptaren todos os réxi-

mes vixentes de axuda que non sexan réximes de axudas estatais de salvamento e reestruturación que sigan en vigor despois do 31 de maio de 2005, para excluír do seu ámbito de aplicación calquera axuda que se lles poida conceder a grandes ou medianas empresas durante o período de reestruturación, incluídas as axudas concedidas de conformidade cun réxime autorizado, sempre que a Comisión non fose informada delas cando tomou a súa decisión sobre a axuda de reestruturación.

Tal adaptación obriga a establecer unha incompatibilidade entre as axudas estatais de salvamento e reestruturación con outros réximes de axuda que puideren aplicar as empresas durante o período de reestruturación. Os réximes sobre os cales recae tal incompatibilidade son o réxime das entidades navieiras en función da tonelaxe, establecido no capítulo XVII do título VII do Real decreto legislativo 4/2004, do 5 de marzo, polo que se aproba o texto refundido da Lei do imposto sobre sociedades, así como determinadas exencións, bonificacións, reducións e réximes fiscais especiais establecidos na Lei 19/1994, do 6 de xullo, de modificación do réxime económico e fiscal das Canarias.

III

A Comisión Europea, por Decisión do 26 de xaneiro de 2005, autorizou a Axuda de Estado N 128/2004 como compatible co Tratado CE. Mediante esta decisión prorrogase até o 31 de decembro de 2006 parte das axudas establecidas no artigo 27 da Lei 19/1994, do 6 de xullo, de modificación do réxime económico e fiscal de Canarias (Axuda N 144/A/96), que venceran o 31 de decembro de 2003. En concreto, a que se refire á posibilidade de materializar as dotacións da reserva para investimentos nas Canarias (RIC) na subscripción de títulos de débeda pública da Comunidade Autónoma de Canarias, das corporacións locais canarias ou das súas empresas públicas ou organismos autónomos, sempre que se destine a financiar investimentos en infraestruturas ou de mellora ou protección do ambiente en territorio canario.

A disposición transitoria oitava da Lei 62/2003, do 30 de decembro, de medidas fiscais, administrativas e da orde social, con base no vencemento temporal da Axuda N 144/A/96, limitou a materialización en débeda pública das dotacións á RIC ás realizadas con cargo aos beneficios obtidos até o 31 de decembro de 2003. Por tanto, de acordo coa nova autorización cómpre, mediante norma legal, prorrogar de novo esta posibilidade prevista no artigo 27 da Lei 19/1994, até o 31 de decembro de 2006.

Artigo primeiro. Modificación do capítulo XVII do título VII, réxime das entidades navieiras en función da tonelaxe, do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

Con efectos para os períodos impositivos que se inicien a partir da entrada en vigor desta lei, introdúcense as seguintes modificacións no texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

Un. Modifícase o artigo 124, que queda redactado da seguinte maneira:

«Artigo 124. *Ámbito de aplicación.*

1. Poderanse acoller ao réxime especial previsto neste capítulo:

a) As entidades inscritas nalgún dos rexistros de empresas navieiras referidos na Lei 27/1992, do 24 de novembro, de portos do Estado e da mariña mercante, cuxa actividade comprenda a explotación de buques propios ou arrendados.

b) As entidades que realicen na súa totalidade a xestión técnica e de tripulación de buques a que se refire o número seguinte. Para estes efectos, enténdese por xestión técnica e de tripulación a asunción da completa responsabilidade da explotación náutica do buque, así como de todos os deberes e responsabilidades impostos polo Código Internacional de Xestión para a Seguraza da Explotación dos buques e a prevención da contaminación adoptado pola Organización Marítima Internacional mediante a Resolución A 741.

2. Os buques cuxa explotación posibilita a aplicación do citado réxime deben reunir os seguintes requisitos:

a) Estar xestionados estratéxica e comercialmente desde España ou desde o resto da Unión Europea. Para estes efectos, enténdese por xestión estratéxica e comercial a asunción polo propietario do buque ou polo arrendatario, do control e risco da actividade marítima ou de traballos no mar.

b) Ser aptos para a navegación marítima e estar destinados exclusivamente a actividades de transporte de mercadorías, pasaxeiros, salvamento e outros servizos prestados necesariamente no mar, sen prexuízo do establecido na alínea c) seguinte.

c) Tratándose de buques destinados á actividade de remolque, será necesario que menos do 50% dos ingresos do período impositivo procedan de actividades que se realicen nos portos e na prestación de axuda a un buque autopropulsado para chegar a porto. Caso de buques con actividade de dragaxe, será necesario que máis do 50% dos ingresos do período impositivo procedan da actividade de transporte e depósito no fondo do mar de materiais extraídos, alcanzando este réxime exclusivamente a esta parte da súa actividade.

Respecto das entidades que cedan o uso destes buques, este requisito entenderase cumprido cando xustifiquen que os ingresos da entidade que desenvolve a actividade de remolque ou dragaxe cumpre aquelas porcentaxes en cada un dos períodos impositivos en que for aplicable este réxime a aquelas entidades.

Os buques destinados á actividade de remolque e de dragaxe deberán estar rexistrados en España ou noutro Estado membro da Unión Europea.

3. Cando o réxime for aplicable a suxeitos pasivos con buques non rexistrados en España ou noutro Estado membro da Unión Europea, o incremento da porcentaxe da tonelaxe neta dos buques respecto do total da frota da entidade acollida ao réxime especial, calquera que for a súa causa, non impedirá a aplicación dese réxime a condición de que a porcentaxe media da tonelaxe neta de buques rexistrados en España ou noutro Estado membro da Unión Europea respecto da tonelaxe neta total referida ao ano anterior ao momento en que se produce o incremento se manteña durante o período dos tres anos posteriores.

Esta condición non se aplicará cando a porcentaxe da tonelaxe neta de buques rexistrados en España ou noutro Estado membro da Unión Europea sexa ao menos do 60 por cento.

4. Non se poderá aplicar este réxime cando a totalidade dos buques non estean rexistrados en España ou noutro Estado membro da Unión Europea. Tampouco se poderán acoller ao presente réxime os buques destinados, directa ou indirecta-

mente, a actividades pesqueiras ou deportivas, nin os de lecer.

5. Non resultará de aplicación este réxime durante os períodos impositivos en que concorran simultaneamente as seguintes circunstancias:

- a) Que a entidade teña a condición de mediana ou grande empresa de acordo co disposto na Recomendación 2003/361/CE da Comisión Europea.
- b) Que perciban unha axuda de Estado de reestruturación concedida ao abeiro do establecido na Comunicación 2004/C244/02 da Comisión Europea.
- c) Que a Comisión Europea non tivese en conta os beneficios fiscais derivados da aplicación deste réxime cando tomou a decisión sobre a axuda de reestruturación.»

Dous. Modifícase o número 1 do artigo 125, que queda redactado da seguinte maneira:

«1. As entidades acollidas a este réxime determinarán a parte de base imponible que corresponda coa explotación, titularidade ou xestión técnica e de tripulación dos buques que reúnan os requisitos do artigo anterior, aplicando ás toneladas de rexistro neto de cada un dos buques a seguinte escala:

Toneladas de rexistro neto	Importe diario por cada 100 toneladas Euros
Entre 0 e até 1.000	0,90
Entre 1.001 e até 10.000	0,70
Entre 10.001 e até 25.000	0,40
Desde 25.001	0,20

Para a aplicación da escala tomaranse os días do período impositivo en que os buques estean ao dispor do suxeito pasivo ou en que se realizase a xestión técnica e de tripulación, excluindo os días en que non estean operativos como consecuencia de reparacións ordinarias ou extraordinarias.

A parte de base imponible así determinada inclúe as rendas derivadas dos servizos de practicaxe, remolque, amarre e desamarre, prestados ao buque adscrito a este réxime, cando o buque sexa utilizado pola propia entidade, así como os servizos de carga, descarga, estiba e desestiba relacionados coa carga do buque transportada nel, sempre que se facturen ao usuario do transporte e sexan prestados pola propia entidade ou por un terceiro non vinculado a ela.

A aplicación deste réxime deberá abranguer a totalidade dos buques do solicitante que cumpran os requisitos daquel, e os buques que se adquiran, arrenden ou xestionen con posterioridade á autorización, sempre que cumpran eses requisitos, podendo acollerse a el buques tomados en fretamento, sempre que a suma da súa tonelaxe neta non supere o 75 por cento do total da frota da entidade ou, se é o caso, do grupo fiscal suxeito ao réxime. No caso de entidades que tributen no réxime de consolidación fiscal, a solicitude deberá estar referida a todas as entidades do grupo fiscal que cumpran os requisitos do artigo 124.»

Tres. Modifícase o número 4 do artigo 125, que queda redactado da seguinte maneira:

«A determinación da parte de base imponible que corresponda ao resto de actividades do suxeito pasivo realizarase aplicando o réxime xeral do

imposto, tendo en conta exclusivamente as rendas procedentes delas. Tratándose de actividade de dragaxe, a parte de base imponible incluirá a renda desa actividade non acollida a este réxime especial.

Esta parte de base imponible estará integrada por todos os ingresos que non procedan de actividades acollidas ao réxime e polos gastos directamente relacionados coa obtención daqueles, ben como pola parte dos gastos xerais de administración que proporcionalmente correspondan á cifra de negocio xerada por estas actividades.

Para os efectos do cumprimento deste réxime, a entidade deberá dispor dos rexistros contables necesarios para poder determinar os ingresos e gastos, directos ou indirectos, correspondentes ás actividades acollidas a este, así como os activos afectos a elas.»

Catro. Modifícase o número 2 do artigo 128, que queda redactado da seguinte maneira:

«2. O incumprimento dos requisitos establecidos no presente réxime implicará o cesamento dos efectos da autorización correspondente e a perda da totalidade dos beneficios fiscais derivados dela, debendo ingresar, xunto á cota do período impositivo en que se produciu o incumprimento, as cotas íntegras correspondentes ás cantidades que se terían que ingresar aplicando o réxime xeral deste imposto, na totalidade dos períodos a que resultou de aplicación a autorización, sen prexuízo dos xuros de demora, recargas e sancións que, se é o caso, resulten procedentes.

O incumprimento da condición establecida no número 3 do artigo 124 desta lei implicará a perda do réxime para aqueles buques adicionais que motivaron o incremento a que se refire ese número, procedendo a regularización establecida no parágrafo anterior que corresponda exclusivamente a tales buques.

Cando tal incremento for motivado pola baixa de buques rexistrados en España ou noutro Estado membro da Unión Europea, a regularización corresponderá a eses buques por todos os períodos impositivos en que estivesen incluídos neste réxime.»

Artigo segundo. *Modificación do artigo 27, reserva para investimentos nas Canarias, da Lei 19/1994, do 6 de xullo, de modificación do réxime económico e fiscal das Canarias.*

Un. Con efectos desde o 1 de xaneiro de 2006, modifícase o número 1, que queda redactado da seguinte maneira:

«1. As sociedades e demais entidades xurídicas suxeitas ao imposto sobre sociedades, excepto as entidades cuxo obxecto principal sexa a prestación de servizos financeiros e aquelas que teñan por obxecto social principal a prestación de servizos a entidades que pertencen ao mesmo grupo de sociedades, no sentido do artigo 42 do Código de comercio, de acordo coas directrices comunitarias, terán dereito á redución na base imponible deste imposto das cantidades que, con relación aos seus establecementos situados nas Canarias, destinen dos seus beneficios á reserva para investimentos de acordo co disposto neste artigo.»

Dous. Con efectos desde o 1 de xaneiro de 2004, modifícase o número 4 do artigo 27, que queda redactado da seguinte maneira:

«4. As cantidades destinadas á reserva para investimentos nas Canarias deberanse materializar

no prazo máximo de tres anos, contados desde a data do devengo do imposto correspondente ao exercicio en que se dotou a citada reserva, na realización dalgún dos seguintes investimentos:

a) A adquisición de activos fixos situados ou recibidos no arquipélago canario, utilizados nel e necesarios para o desenvolvemento de actividades empresariais do suxeito pasivo ou que contribúan á mellora e protección do ambiente no territorio canario. Para tal efecto, entenderanse situados e utilizados no arquipélago as aeronaves que teñan a súa base nas Canarias e os buques con pavillón español e matriculados nas Canarias, incluídos os inscritos no Rexistro especial de buques e empresas navieiras.

Consideraranse como adquisición de activo fixo os investimentos realizados por arrendatarios en inmobles, cando o arrendamento teña unha duración mínima de cinco anos, e os investimentos destinados á rehabilitación dun activo fixo se, en ambos os casos, cumpren os requisitos contables para seren considerados como activo fixo para o investidor.

Para os efectos do disposto nesta alínea, entenderanse situados ou recibidos no arquipélago canario as concesións administrativas de uso de bens de dominio público radicados nas Canarias, as concesións administrativas de prestación de servizos públicos que se desenvolvan exclusivamente no arquipélago, así como as aplicacións informáticas e os dereitos de propiedade industrial que non sexan meros signos distintivos do suxeito pasivo ou dos seus produtos e que se vaian aplicar exclusivamente en procesos produtivos ou actividades comerciais que se desenvolvan no ámbito territorial canario.

O importe dos gastos en investigación que cumpran os requisitos para seren contabilizados como activo fixo considerarase materialización da reserva para investimentos na parte correspondente aos gastos de persoal satisfeitos a investigadores cualificados adscritos en exclusiva a actividades de investigación e desenvolvemento realizadas nas Canarias, e na parte correspondente aos gastos de proxectos de investigación e desenvolvemento contratados con universidades, organismos públicos de investigación ou centros de innovación e tecnoloxía, oficialmente reconecidos e rexistrados e situados nas Canarias. Esta materialización será incompatible, para os mesmos gastos, con calquera outro beneficio fiscal.

Tratándose de activos fixos usados, estes non se poderán ter beneficiado anteriormente do réxime previsto neste artigo, e deberán supor unha mellora tecnolóxica para a empresa.

O inmovible adquirido para a súa rehabilitación terá a consideración de activo usado apto para a materialización da reserva cando o custo da reforma sexa superior á parte do prezo de adquisición correspondente á construción.

b) A subscrición de títulos valores ou anotacións en conta de débeda pública da Comunidade Autónoma de Canarias, das corporacións locais canarias ou das súas empresas públicas ou organismos autónomos, sempre que se destine a financiar investimentos en infraestrutura ou de mellora e protección do ambiente no territorio canario, co límite do 50 por 100 das dotacións.

Para estes efectos o Goberno da Nación aprobará a contía e o destino das emisións, a partir das propostas que en tal sentido lle formule a Comuni-

dade Autónoma de Canarias, logo de informe do Comité de Investimentos Públicos.

c) A subscrición de accións ou participacións no capital de sociedades que desenvolvan no arquipélago a súa actividade, sempre que estas realicen os investimentos previstos na alínea a) deste número, nas condicións reguladas nesta lei. Estes investimentos non darán lugar á aplicación de ningún outro beneficio fiscal por tal concepto.»

Tres. Con efectos desde o 1 de xaneiro de 2004, modifícase o número 5 do artigo 27, que queda redactado da seguinte maneira:

«5. Os elementos en que se materialice a reserva para investimentos, cando se trate de elementos dos previstos na alínea a) do número 4 anterior, deberán permanecer en funcionamento na empresa do mesmo suxeito pasivo durante cinco anos como mínimo ou durante a súa vida útil se for inferior, sen ser obxecto de transmisión, arrendamento ou cesión a terceiros para o seu uso.

Cando se trate dos valores a que se refiren as alíneas b) e c) do número anterior, deberán permanecer no patrimonio do suxeito pasivo durante cinco anos ininterrompidos.

Os suxeitos pasivos que se dediquen, a través dunha explotación económica, ao arrendamento ou cesión a terceiros para o seu uso de activos fixos poderán desfrutar do réxime da reserva para investimentos, sempre que non exista vinculación, directa ou indirecta, cos arrendatarios ou cesionarios deses bens nin se trate de operacións de arrendamento financeiro.»

Catro. Con efectos desde o 1 de xaneiro de 2006, modifícase o número 10 do artigo 27, que queda redactado da seguinte maneira:

«10. Os suxeitos pasivos a que se refire este artigo poderán levar a cabo investimentos anticipados de futuras dotacións á reserva para investimentos, sempre que cumpran os restantes requisitos exixidos nel e as citadas dotacións se realicen con cargo a beneficios obtidos até o 31 de decembro de 2006.

Comunicarase a citada materialización e o seu sistema de financiamento conxuntamente coa declaración do imposto sobre sociedades, o imposto sobre a renda de non residentes ou o imposto sobre a renda das persoas físicas do período impositivo en que se realicen os investimentos anticipados.

O incumprimento de calquera dos requisitos previstos neste número ocasionará a perda do beneficio fiscal e será de aplicación o previsto no número 8 deste artigo.»

Artigo terceiro. *Modificación do título VII, Rexistro especial de buques e empresas navieiras, da Lei 19/1994, do 6 de xullo, de modificación do Réxime económico e fiscal das Canarias.*

Con efectos para os períodos impositivos que se inicien a partir da entrada en vigor desta lei, introdúcense as seguintes modificacións na Lei 19/1994, do 6 de xullo, de modificación do Réxime económico e fiscal das Canarias:

Un. Modifícase o número 2 do artigo 73, que queda redactado da seguinte maneira:

«2. Os tripulantes e as empresas dos buques que estean adscritos aos servizos regulares entre as

illas Canarias e entre estas e o resto do territorio nacional, mentres estes non se poidan inscribir no rexistro especial, de conformidade co previsto no número anterior poderán, non obstante, desfrutar das exencións do imposto sobre transmisións patrimoniais e actos xurídicos documentados, do imposto sobre a renda das persoas físicas e do imposto sobre a renda de non residentes establecidas nos artigos 74 e 75.1 desta lei, das bonificacións do imposto sobre sociedades establecidas no artigo 76.1 desta lei e das bonificacións nas cotizacións á Seguridade Social establecidas no artigo 78 desta lei.

Cando os servizos regulares a que se refire o parágrafo anterior sexan de pasaxeiros, a exención e a bonificación previstas respectivamente nos artigos 75.1 e 78 desta lei, unicamente resultarán de aplicación aos tripulantes que sexan nacionais dalgún Estado membro da Unión Europea ou dalgún dos Estados parte no Acordo sobre o Espazo Económico Europeo.»

Dous. Modifícase o artigo 75, que queda redactado da seguinte maneira:

«Artigo 75. *Imposto sobre a renda das persoas físicas e imposto sobre a renda de non residentes.*

1. Para os tripulantes dos buques inscritos no Rexistro especial de buques e empresas navieiras, contribuíntes do imposto sobre a renda das persoas físicas, terá a consideración de renda exenta o 50 por 100 dos rendementos do traballo persoal que se devengasen con ocasión da navegación realizada en buques inscritos no citado rexistro.

2. Para os tripulantes dos buques inscritos no Rexistro especial de buques e empresas navieiras contribuíntes do imposto sobre a renda de non residentes, terá a consideración de renda exenta o 50 por 100 dos rendementos do traballo persoal que se devengasen con ocasión da navegación realizada en buques inscritos no citado rexistro.

3. Non obstante, cando se trate de buques adscritos a servizos regulares de pasaxeiros entre portos da Unión Europea, o disposto nos números anteriores unicamente resultará de aplicación aos tripulantes que sexan nacionais dalgún Estado membro da Unión Europea ou dalgún dos Estados parte no Acordo sobre o Espazo Económico Europeo.»

Tres. Modifícase o artigo 78, que queda redactado da seguinte maneira:

«Artigo 78. *Bonificación nas cotizacións á Seguridade Social.*

1. Para os tripulantes dos buques inscritos no Rexistro especial de buques e empresas navieiras establécese unha bonificación do 90 por cento na cota empresarial á Seguridade Social.

Non obstante, cando se trate de buques adscritos a servizos regulares de pasaxeiros entre portos da Unión Europea, o disposto no parágrafo anterior unicamente resultará de aplicación aos tripulantes que sexan nacionais dalgún Estado membro da Unión Europea ou dalgún dos Estados parte no Acordo sobre o Espazo Económico Europeo.

2. Esta bonificación afectará todos os conceptos incluídos na cotización.

3. Esta bonificación financiarase mediante a correspondente achega do Estado ao orzamento da Seguridade Social.»

Artigo cuarto. *Adición dunha disposición adicional, incompatibilidade entre axudas de Estado, á Lei 19/1994, do 6 de xullo, de modificación do Réxime económico e fiscal das Canarias.*

Engádesse unha disposición adicional décimo segunda, que queda redactada da seguinte maneira:

«Disposición adicional décimo segunda. Incompatibilidade entre axudas de Estado.

1. Non resultarán de aplicación as exencións previstas nos artigos 74 e 75, as bonificacións establecidas nos artigos 26, 76 e 78, a redución regulada no artigo 27, as exencións e bonificacións previstas no artigo 73 nin o réxime fiscal especial previsto nos artigos 42, 43, 44, 45, 48 e 49, nos períodos impositivos en que concorran as seguintes circunstancias:

a) Que os suxeitos pasivos a que se refiren os citados preceptos teñan a condición de mediana ou grande empresa de acordo co disposto na Recomendación 2003/361/CE da Comisión Europea. Cando se trate da exención prevista no artigo 75, o cumprimento deste requisito entenderase referido aos pagadores dos rendementos do traballo parcialmente exentos.

b) Que estes suxeitos pasivos perciban unha axuda de Estado de reestruturación concedida ao abeiro do establecido na Comunicación 2004/C244/02 da Comisión Europea.

c) Que a Comisión Europea non tivese en conta os beneficios fiscais derivados da aplicación deste réxime cando tomou a decisión sobre a axuda de reestruturación.

2. Non resultarán aplicables as exencións previstas nos artigos 25, 46, 47 e 50 ás operacións que determinasen a percepción de axudas de reestruturación nas circunstancias previstas nas alíneas a) a c) do número anterior.»

Artigo quinto. *Modificación da compensación a tanto global aplicable no réxime especial da agricultura, gandaría e pesca do imposto sobre o valor engadido.*

Modifícase o artigo 130.cinco da Lei 37/1992, do 28 de decembro, do imposto sobre o valor engadido, que queda redactado da seguinte maneira:

«Cinco. A compensación a tanto global a que se refire o número tres deste artigo será a cantidade resultante de aplicar, ao prezo de venda dos produtos ou dos servizos indicados nese número, a porcentaxe que proceda de entre as que se indican a seguir:

1.º O 9 por 100, nas entregas de produtos naturais obtidos en explotacións agrícolas ou forestais e nos servizos de carácter accesorio desas explotacións.

2.º O 7,5 por 100, nas entregas de produtos naturais obtidos en explotacións gandeiras ou pesqueiras e nos servizos de carácter accesorio desas explotacións.

Para a determinación dos referidos prezos non se computarán os tributos indirectos que graven as citadas operacións nin os gastos accesorios ou complementarios delas cargados separadamente ao adquirente, tales como comisións, embalaxes, portes, transportes, seguros, financeiros ou outros.

Nas operacións realizadas sen contraprestación en diñeiro, as referidas porcentaxes aplicaranse sobre o valor de mercado dos produtos entregados ou dos servizos prestados.

A porcentaxe aplicable en cada operación será o vixente no momento en que naza o dereito a percibir a compensación.»

Disposición adicional primeira. *Prazo de presentación de solicitudes para a aplicación do «Réxime das entidades navieiras en función da tonelaxe».*

Aquelas sociedades que, como consecuencia da ampliación do ámbito de aplicación do réxime das entidades navieiras en función da tonelaxe establecida no artigo 124 do texto refundido da Lei do imposto sobre sociedades na súa nova redacción dada por esta lei, se poidan acoller a tal réxime no primeiro período impositivo iniciado dentro dos tres meses seguintes a partir da data da súa entrada en vigor, poderán presentar a solicitude no prazo de tres meses contados desde esta última data.

Disposición adicional segunda. *Réxime do Consello Internacional de Supervisión Pública en estándares de auditoría, ética profesional e materias relacionadas.*

Un. O réxime fiscal aplicable ao Consello Internacional de Supervisión Pública en estándares de auditoría, ética profesional e materias relacionadas será o seguinte:

a) Estará totalmente exento do imposto sobre sociedades, nos termos previstos para as entidades exentas no artigo 9, número 1, do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

b) Os rendementos do traballo percibidos do Consello polo secretario xeral, o persoal directivo e o persoal laboral que desempeñen unha actividade directamente relacionada co seu obxecto estatutario, estarán exentos do imposto sobre a renda das persoas físicas.

O disposto nesta alínea non será de aplicación cando as persoas físicas a que se refire teñan a nacionalidade española ou tivesen a súa residencia en territorio español con anterioridade ao inicio do desempeño da actividade relacionada no Consello.

c) Gozará da exención subxectiva prevista no artigo 45.I.A.a) do texto refundido da Lei do imposto sobre transmisións patrimoniais e actos xurídicos documentados, aprobado polo Real decreto legislativo 1/1993, do 24 de setembro, co alcance e os efectos que nel se establecen.

d) Estarán exentos do imposto sobre bens inmobles os bens inmobles que se encontren afectos á súa actividade, de acordo co seu obxecto social ou finalidade específica e en cumprimento dos seus fins.

O Consello estará exento do imposto sobre actividades económicas polas explotacións económicas que puiden derivar das súas actividades dentro dos seus estatutos e en cumprimento dos seus fins.

Para efectos do establecido neste número, non será de aplicación o disposto no primeiro parágrafo do número 2 do artigo 9 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo.

Dous. Os empregados do Consello Internacional de Supervisión Pública en estándares de auditoría, ética profesional e materias relacionadas, calquera que for a súa nacionalidade, serán afiliados ao sistema de Seguridade

Social español. Non obstante, quedará exonerada esta obriga naqueles casos en que se acredite a existencia de cobertura por parte doutro réxime de protección social que outorgue prestacións en extensión e intensidade equivalentes, como mínimo, ás dispensadas polo sistema de Seguridade Social español.

Tres. O réxime previsto para o Consello Internacional de Supervisión Pública en estándares de auditoría, ética profesional e materias relacionadas contido no número un será de aplicación a partir do 1 de xaneiro de 2006.

Disposición adicional terceira. *Incorporación dun novo artigo 77 bis á Lei 19/1994, do 7 de xullo, de modificación dos aspectos económicos do Réxime económico e fiscal das Canarias.*

Incorpórase un novo artigo 77 bis á Lei 19/1994, do 7 de xullo, de modificación dos aspectos económicos do Réxime económico e fiscal das Canarias, que queda redactado da seguinte maneira:

«Artigo 77 Bis. *Impostos especiais.*

A primeira matriculación definitiva de embarcacións no Rexistro especial de buques e empresas navieiras non estará suxeita ao imposto especial de determinados medios de transporte.»

Disposición transitoria primeira. *Incumprimento dos requisitos para a aplicación do «Réxime das entidades navieiras en función da tonelaxe».*

Aquelas entidades que, tendo autorización do Ministerio de Economía e Facenda para aplicaren o «Réxime das entidades navieiras en función da tonelaxe» a períodos impositivos iniciados a partir da entrada en vigor desta lei, no entanto, non cumprisen os novos requisitos establecidos nela, deberán realizar as actuacións necesarias para adaptarse aos requisitos dentro do prazo dos tres primeiros períodos impositivos iniciados desde a referida entrada en vigor. En caso contrario, tales entidades tributarán no réxime xeral desde o período impositivo inmediato seguinte.

Disposición transitoria segunda. *Aplicación das novas porcentaxes da compensación a tanto global.*

O disposto na nova redacción do artigo 130.cinco da Lei 37/1992, do 28 de decembro, do imposto sobre o valor engadido, dada polo artigo quinto desta lei, será aplicable ás compensacións que se paguen a partir do 1 de xaneiro de 2006.

Disposición derradeira primeira. *Modificación do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.*

Con efectos desde a entrada en vigor da Lei 25/2005, do 24 de novembro, reguladora das entidades de capital-risco e as súas sociedades xestoras, dáselle nova redacción á alínea d) do número 1 do artigo 7 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo, que quedará redactada nos seguintes termos:

«d) Os fondos de capital-risco, regulados na Lei 25/2005, do 24 de novembro, reguladora das entidades de capital-risco e as súas sociedades xestoras.»

Disposición derradeira segunda. *Modificación da Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ao mecenado.*

Con efectos para os períodos impositivos iniciados a partir do 1 de xaneiro de 2004, dáselle nova redacción á disposición adicional quinta da Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ao mecenado, que quedará redactada nos seguintes termos:

«Disposición adicional quinta. Réxime tributario da Cruz Vermella Española e da Organización Nacional de Cegos Españóis.

O réxime previsto nos artigos 5 a 15, ambos inclusive, desta lei será de aplicación á Cruz Vermella Española e á Organización Nacional de Cegos Españóis, sempre que cumpran o requisito establecido no penúltimo parágrafo do número 5.º do artigo 3 desta lei, conservando a súa vixencia as exencións concedidas con anterioridade á súa entrada en vigor.

Estas entidades serán consideradas como entidades beneficiarias do mecenado para os efectos previstos nos artigos 16 a 25, ambos inclusive, desta lei.

Terá a consideración de explotación económica exenta, para os efectos do disposto no artigo 7 desta lei, a comercialización pola Organización Nacional de Cegos Españóis de calquera tipo de xogo autorizado polo Goberno da Nación, de conformidade co réxime xurídico previsto na disposición adicional cuarta da Lei 55/1999, do 29 de decembro, de medidas fiscais, administrativas e da orde social.»

Disposición derradeira terceira. *Entrada en vigor.*

1. Esta lei entrará en vigor o día seguinte ao da súa publicación no «Boletín Oficial del Estado».

2. A regularización que, se é o caso, se deba efectuar en cumprimento do disposto no derradeiro parágrafo do número 2 do artigo 128 do texto refundido da Lei do imposto sobre sociedades, aprobado polo Real decreto lexislativo 4/2004, do 5 de marzo, practicarase unicamente en relación cos períodos impositivos iniciados a partir da entrada en vigor desta lei.

Por tanto,

Mando a todos os españois, particulares e autoridades, que cumpran e fagan cumprir esta lei.

Madrid, 29 de marzo de 2006.

JUAN CARLOS R.

O presidente do Goberno,

JOSÉ LUIS RODRÍGUEZ ZAPATERO

5693 *CORRECCIÓN de erros da Lei 30/2005, do 29 de decembro, de orzamentos xerais do Estado para o ano 2006. («BOE» 76, do 30-3-2006.)*

Advertidos erros na Lei 30/2005, do 29 de decembro, de orzamentos xerais do Estado para o ano 2006, publicada no «Boletín Oficial del Estado», suplemento número 1 en lingua galega, do 2 de xaneiro de 2006, procédese a efectuar as oportunas rectificacións:

Páx. 10: exposición de motivos, punto X, décimo terceiro parágrafo, segunda liña. Onde di: «... sorteos especiais de Lotaría Nacional.»; debe dicir: «... sorteos de Lotaría Nacional.»

Páx. 14: artigo 12, punto dous. Onde di: «... poderanse incorporar aos créditos do exercicio 2004 os remanentes ...»; debe dicir: «... poderanse incorporar aos créditos do exercicio 2006 os remanentes ...».

Páx. 17: artigo 19, punto dous, segundo parágrafo, novena liña. Onde di: «... ao mes de xuño, e polo 100 por cento deste complemento na do mes de decembro.»; debe dicir: «... ao mes de xuño, e o 100 por cento deste complemento na do mes de decembro.»

Páx. 18: artigo 21, punto un, letra d, relativo ás contías da contribución individual ao plan de pensións, na fila correspondente ao grupo D, a contía en euros, por soldo. Onde di: «67,61»; debe dicir: «67,71».

Páx. 23: artigo 26, punto un.c), relativo ao complemento de dedicación especial, terceira liña. Onde di: «... o artigo 19.1 do Real decreto 662/2001, do 22 de xuño ...»; debe dicir: «... artigo 13.1 do Regulamento aprobado polo Real decreto 1314/2005, do 4 de novembro ...».

Páx. 23: artigo 26, punto dous, segundo parágrafo, sétima liña. Onde di: «... o artigo 6 do Regulamento de retribucións do persoal das Forzas Armadas, aprobado polo Real decreto 662/2001, do 22 de xuño ...»; debe dicir: «... o artigo 4.5 do Regulamento de retribucións do persoal das Forzas Armadas, aprobado polo Real decreto 1314/2005, do 4 de novembro ...».

Páx. 27: artigo 34.Tres, primeiro parágrafo. Onde di: «O informe citado o número un...»; debe dicir: «O informe citado no número un...».

Páx. 33: artigo 43.Tres, na última cela da táboa «Complementos para mínimos» correspondente aos importes da «Pensión familiar distinta da de viuvez, sendo N o número de beneficiarios da pensión ou pensións».

	«460,65	«6.449,10
Onde di:	euros/mes e	euros/ano
	N»	N»;
	«460,65	«6.449,10
debe dicir:	euros/mes e	euros/ano, respectivamente».
	N»	N

Páx. 40: artigo 64, no último parágrafo. Onde di: «j) A constitución ou transmisión ...»; debe dicir: «i) A constitución ou transmisión ...».

Páx. 42: artigo 67, no cadro correspondente ao coeficiente C5, a referencia que figura na columna «Escala de valores» de «Ata + 100%» debe aparecer á altura do concepto «Poboación».

Páx. 51: artigo 71, tarifa E.2. no número 2, na terceira liña. Onde di: «... cuxo obxecto sexa o tráfico interinsular, para o resto ...»; debe dicir: «... cuxo obxecto sexa o tráfico interinsular. Para o resto ...».

Páx. 53: artigo 73, na modificación da taxa regulada no artigo 19, parágrafo once. Onde di: «Renovación de acreditacións para operar ou dirixir instalacións de radiodiagnóstico 38,59 euros»; debe dicir: «Renovación de acreditacións para operar ou dirixir instalacións de radiodiagnóstico: 38,59 euros».

Páx. 73: disposición adicional novena. Dous, a referencia que se fai, na 12.ª liña, ao «número 3» debe facerse ao punto Tres.

Páx. 73: disposición adicional décima, no punto dous. Onde di: «... deducións establecidas dos artigos 19, 20 e 21 ...»; debe dicir: «... deducións establecidas nos artigos 19, 20 e 21 ...».

Páx. 79: disposición adicional cuadraxésimo segunda. Tres: no número 2 da lei que se modifica, 1.ª e 2.ª liñas. Onde di: «Cando, como consecuencia do servizo de traspasos estatais...»; debe dicir: «Cando, como consecuencia do traspaso de servizos estatais...».